

**MAHINUNGDANONG MGA PAMAHAYAG
ALANG SA 2022 INTERNATIONAL CHINESE-SPEAKING
CONFERENCE**

**Tibuok-kinabuhi, mapadayonon nga butang
ang pagdawat nato ni Cristo nga Espiritu sa grasya
diha sa atong espiritu;
adlaw-adlaw naa gyod untay kahibulongan
nga diosnong pagpalatay nga nagpadayon samtang
madagayaong gisangkap sa Tulo-usang Dios ang Espiritu sa grasya,
ug sige natong gidawat ang Espiritu sa grasya.**

**Ang pagkinabuhi sa mga magtutuo sa Bag-ong Tugon
ilalom sa grasya sa Dios diha sa pamatigayon sa Dios—
ang kinatibuk-ang pagkinabuhi nga nagsinati
sa nahikay ug nahingpit nga Tulo-usang Dios ingon nga grasya—
mahingpit sa iglesia nga organicong Lawas ni Cristo.**

**Ang grasya mao si Cristo nga Tigpas-an-sa-luwan nato
ug nidagaya kanato pinaagi sa atong mga pag-antos,
mga paglimiti kanato, ug mga kaluyahon;
labi kadaghan ang atong luwan, maglabi kadaghan sab
ang kahigayonan nga makasinati ta ni Cristo nga grasya.**

**Ang kinahingpitan ug kinataposang lugwa sa grasya sa Dios
sa Iyang pamatigayon mao ang Lawas ni Cristo nga balak sa Dios
nga mahimong Bag-ong Jerusalem
nga kahingpitan sa pagkamatarong sa Dios
sa bag-ong mga langit ug bag-ong yuta;
ang kadato sa Dios mismo nga mapahimuslan nato
nilabaw sa tanang paglimiti ug mapasundayag
nga makita sa tanan sa eternidad.**

**Mga Talamdan sa Mga Mensahe
alang sa International Chinese-speaking Conference
Pebrero 18-20, 2022**

**LINANGKOB NGA HISGOTANAN:
ANG GRASYA SA DIOS DIHA SA PAMATIGAYON SA DIOS**

Mensahe 1

**Ang Pagkamakahuloganon Gyod Kaayo sa Grasya sa Dios
ingon sa Gipadayag sa Bag-ong Tugon**

Basahong Kasulatan: Juan 1:14, 16-17; Heb. 10:29; 1 Ped. 5:10; Efe. 1:5-6; 2:7-8; Bug. 22:21

I. Makahuloganon gyod kaayo ang grasya sa Dios—Juan 1:14, 16-17; Efe. 2:7; Bug. 22:21:

- A. Ang grasya maoy kinadak-ang kamatuoran ug kinalabwang pinadayag sa pamatigayon sa Dios sa Bag-ong Tugon—Juan 1:14, 16-17; Heb. 10:29; 1 Cor. 15:10; Fil. 4:23; Bug. 22:21.
- B. Kon buot tang makasabot kon unsa ang grasya sa Dios ingon sa gipadayag sa Bag-ong Tugon, nagkinahanglan tag klarong pagkakita sa Bag-ong Tugon sa kinatibuk-an.

II. Matod pa sa Bag-ong Tugon, ang grasya sa pagkatinuod mao ang Dios alang nato aron atong mapahimuslan—Juan 1:16-17; 2 Cor. 12:9:

- A. Ang grasya mao ang Dios dili sa doktrina kondili sa atong kasinatian, kay ang grasya mao man ang Dios diha ni Cristo ug sa tanan Niyang pagkamao nga atong mapahimuslan; naglakip kini sa kinabuhi, kusog, paglipay, pahulay, kahayag, pagkamatarong, pagkabalaan, gahom, ug uban pang diosnong kaayo.
- B. Ang grasya dili labi gyong ang buhat nga gibuhay sa Dios alang nato; ang grasya mao ang Tulo-usang Dios mismo nga gipaambit sa atong pagkatawo ug nasinati nato aron mapahimuslan nato—13:14.
- C. Ang Bag-ong Tugon kasaysayan man sa grasya sa Dios nga pagpakatawo sa Tulo-usang Dios diha sa Iyang Diosnong Trinidad nga nahikay ug nahingpit ug naglihok ug nagkinabuhi diha sa ug taliwala sa mga magtutuo—Juan 1:14, 16-17; Bug. 22:21.

III. Ang grasya mao ang pagpadayag sa Tulo-usang Dios diha sa pagkalawas Niya sa tulo ka aspeto—sa Amahan, sa Anak, ug sa Espiritu—2 Cor. 13:14; Num. 6:22-27; Sal. 36:8-9:

- A. Ang grasya mao ang Tulo-usang Dios sa pagpakatawo Niya nga ipaambit ngadto sa mga magtutuo sa Amahan nga tinubdan, sa Anak nga elemento, ug sa Espiritu nga pag-aplikar—2 Cor. 13:14:
 - 1. Ang tinubdan sa grasya, ang elemento sa grasya, ug ang pag-aplikar sa grasya mao ang tulo ka persona sa Diosnong Trinidad nga mahimong atong tanan—Mat. 28:19.
 - 2. Sa diosnong pagpaambit, ginganlan ang grasya og ang grasya sa Dios, ang grasya ni Cristo, ug ang grasya nga mao ang Espiritu—1 Cor. 15:10; 2 Cor. 1:12; 8:1, 9; 9:14; 12:9; 13:14; Heb. 10:29.
- B. Ang grasya mao ang pagkalawas sa Dios, nga nahimong Dios-tawo nga naay pagkadios ug pagka-tawo, niagi sa pagkinabuhi ingog tawo, namatay, nabanhaw, ug

nisulod sa pagkayab; karon Siya ang Espiritung taghatag-og-kinabuhi nga nag-puyo sa sulod nato—1 Cor. 15:45b; 6:17.

- C. Ang grasya mao ang Tulo-usang Dios nga nahikay ug nahingpit alang nato aron mapahimuslan nato Siya—Juan 1:14, 16-17; 1 Ped. 5:10; 2 Cor. 13:14; Heb. 10:29; 1 Cor. 15:10, 45b; Bug. 22:21.
- D. Kon wala pa mahikay, dili mahimong grasya ang Tulo-usang Dios kanato—Juan 1:14; 1 Cor. 15:45b:
 - 1. Gipakalawas ang Amahan diha sa Anak, naamgohan ang Anak ingon nga Espiritu, ug nisulod ang Espiritu kanato ingon nga grasya aron mapahimuslan nato—Heb. 10:29.
 - 2. Gipaambit sa nahikay ug nahingpit nga Tulo-usang Dios ang Iyang Kaugalingon kanato aron mahimong pahat nato isip grasya para mapahimuslan nato Siya ingon nga tanan diha sa Diosnong Trinidad Niya—2 Cor. 13:14.

IV. “Gigrasyahan [ta sa atong Dios ug Amahan] diha sa Pinalangga”—Efe. 1:6b:

- A. Nagpasabot kanang gigrasyahan ta sa Dios nga gibutang ta Niya sa posisyon sa grasya aron mahimo tang tumong sa grasya ug maayong pagtagad Niya, sa ato pa, aron makapahimulos ta sa tanang pagkamao sa Dios alang nato—v. 6b:
 - 1. Kay naa man ta sa posisyon sa grasya ug maoy tumong sa grasya, nahimuot ang Dios kanato.
 - 2. Naa nato ang kalipay sa Dios, nalipay ta diha Niya, ug sa kapulihay, naay pagpahimulosay; nagpahimulos ta Niya, ug nagpahimulos Siya nato.
- B. Ang Pinalangga mao ang pinalanggang Anak sa Dios, nga gikalipayan Niya—Mat. 3:17; 17:5:
 - 1. Diha sa Pinalangga gigrasyahan ta, gihimong tumong sa maayong pagtagad ug kahimuot sa Dios—Efe. 1:6b.
 - 2. Sa pagka-ingon niana nga tumong, nagpahimulos ta sa Dios, ug nagpahimulos Siya nato diha sa Iyang grasya diha sa Iyang Pinalangga, nga kalipay Niya; diha sa Pinalangga nahimo sab tang kalipay Niya—Mat. 3:17; 17:5.

V. Niingon si Pablo sa Efeso 2:8 nga, “Nangaluwas mo tungod sa grasya pinaagi sa pagtuo, ug dili kini sa inyong kaugalingon; gasa kini sa Dios”:

- A. Ang grasya mao ang Dios nga gipaambit kanato; busa, ang maluwas tungod sa grasya nagpasabot nga maluwas ta tungod kay gipaambit ang nahikay nga Tulo-usang Dios kanato.
- B. Gipadayag sa Efeso nga ang nagluwas nga grasya mao ang Dios mismo diha ni Cristo nga gipaambit sa atong pagkatawo; busa, ang maluwas tungod sa grasya sa pagkatinuod nagpasabot og maluwas tungod sa pagpaambit sa Tulo-usang Dios kanato.
- C. Ipaambit ngani kanato ang nahikay nga Tulo-usang Dios, mahimo Siyang nagluwas nga grasya alang nato sa kasinatian nato—2 Cor. 13:14.

VI. Gitudlo na tang daan sa Dios ngadto sa pagkaanak aron “daygon ang himaya sa Iyang grasya”—Efe. 1:5-6a:

- A. Ang himaya mao ang Dios nga napadayag (Exo. 40:34); nagpakita *ang himaya sa Iyang grasya* nga nagpadayag sa Dios ang Iyang grasya, nga Siya mismo nga atong pagpahimulos.
- B. Ang pagtudlong daan sa Dios kanato ngadto sa pagkaanak alang man sa pagdayeg sa Iyang pagpadayag diha sa Iyang grasya, sa ato pa, alang sa pagdayeg sa himaya sa Iyang grasya—Efe. 1:5-6a.

VII. “[Ipasundayag sa Dios] sa kapanahonang moabot ang labaw gyod nga kadato sa Iyang grasya diha sa kalulot nganhi nato diha ni Cristo Jesus”—2:7:

- A. Sa kalulot sa Dios nganhi nato diha ni Cristo Jesus, giluwat ta Niya pinaagi sa Iyang grasya; nianang kalulota gihatag ang grasya sa Dios kanato—v. 7; Rom. 2:4.
- B. Ang kadato sa grasya sa Dios mao ang kadato sa Dios mismo nga gipaambit kanato nga atong masinati ug mapahimuslan; dili gyod malimitihan ang kadato sa grasya sa Dios.
- C. Sa kapanahonang moabot—sa millennium ug sa eternidad—ipasundayag sa Dios sa tibuok uniberso ang labaw gyod nga kadato sa Iyang grasya—Efe. 2:7.